

peu de personnes s'en souuiennent, il est enuoyé de la part de Dieu Seigneur de l'Vniuers. Les infidelles disent, ô Prophete, si tu parle nous ne t'escouterons pas, ta parole n'entrera pas dans nos cœurs: Dis leur, il n'y a personne entre vous qui vous puisse deliurer de la punition de vos crimes, l'Alcoran enseigne le chemin de salut à ceux qui croient en sa diuine Majesté, ie sçay qu'il y a des menteurs entre vous que Dieu mettra au nombre des infidelles, l'Alcoran est la verité mesme. Loué soit le nom de Dieu tout-Puissant & majestueux.

*LE CHAPITRE DE LA MONTE'E,
contenant quarante-quatre versets,
escrit à la Meque.*

AV nom de Dieu clement & misericordieux. Quelques personnes ont demandé quand sera le iour du Iugement, & en quel temps les meschans seront chastiez; Personne autre que Dieu ne peut deliurer les hommes des tourmens de l'Enfer, il est maistre du chemin qui monte au Ciel, les Anges & les esprits monteront vers luy au iour du Iugement; Ce iour semblera durer aux meschans cinquante mil ans, attens avec patience, les meschans estiment qu'ils sont esloignez de ce iour, mais tu le verras bien-tost, ce iour le Ciel semblera du metal fondu, les monta-

gnes seront semblables à la laine cardée qui s'abaisse, personne ne demandera à son voisin quel il est, & se regarderont les vns les autres, les infidelles souhaiteront de se racheter de ces peines par la perte de leurs enfans, de leurs femmes, de leurs freres, de leurs compagnons, de leur voisin, & par la perte de tout ce qui est en terre. La flamme du feu s'eleuera sur eux, & leur brullera la peau de la teste, ils appelleront ceux qui seront derriere eux, qui auront comme eux abandonné la loy de Dieu, & les auaricieux qui auront accumulé des tresors. L'homme a esté créé timide, il est effrayé lors qu'il luy arriue du mal, & est orgueilleux lors qu'il luy arriue du bien, excepté les fidelles qui sont fermes en leur foy, qui perseverent en leurs prieres, qui font des aumosnes aux pauvres mendians & aux pauvres honteux, qui croyent au iour du iugement, qui craignent la punitiõ de dieu, & qui ne cognoissent point d'autres femmes que les leurs & leurs esclaves, ils seront exempts d'affliction au iour du iugement, ceux qui feront le contraire seront au nombre des iniustes. Ceux qui effectuent ce qu'ils ont promis, & qui conseruent fidellement ce qui leur a esté confié, qui disent la verité en tesmoignage, & ceux qui font leurs prieres au temps ordonné, seront honorez dedans le Paradis. Pourquoy est-ce que les infidelles qui sont auprès de toy iettent la veüe à droict & à gauche avec orgueil? demandent-ils d'entrer dans le Paradis & d'estre sauuez? Nous les auons créés comme les autres hom-

mes. Je iure par le Seigneur du Leuant & du Ponant que nous les pouuons changer en vn peuple meilleur qu'eux, & que c'est chose qui nous est facile à faire; Laissez-les dans leurs erreurs iusques à ce qu'ils soient arriuez au iour qu'on à promis de les chastier, & qu'ils sortiront des monumens pour accourir au Iugement vniuersel, ils y accourront effrayez, & leur veüe sera couuette de honte; C'est ce iour qu'on leur a cy-deuant presché.

LE CHAPITRE DE NOË,
contenant vingt-huit versets, escrit
à la Meque.

AV nom de Dieu clement & misericordieux. Auant que chastier les hommes, nous auons enuoyé Noé pour leur prescher les peines de l'Enfer, il leur a dit. O peuple; ie vous presche les peines de l'Enfer, adorez vn seul Dieu & le craignez, obeissez moy, il vous pardonnera vos pechez, il differe vostre chastiment iusques à iour nommé, & ne le retardera pas lors que son heure sera vennë, si vous la scauiez vous vous conuertiriez. Apres il dit, Seigneur, i'ay exhorté ce peuple nuit & iour, mais mes exhortations ont esté tres-inutiles, ils se sont fortifiez dans leur impieté, & lors que ie les ay preschés ils ont mis leurs doigts dans leurs oreilles